

Kufichwa Pamoja na Yesu Ndani ya Mungu

*Mwenye haki atastawi kama mtende, Atakua kama mwerezi wa Lebanoni—
Zaburi 92:12.*

Mwangalie msafiri aliyechoka akihangaika katika mchanga wenye joto kali wa jangwani, akiwa hana mahali pa kukimbilia ili kujikinga na miale ya jua liunguzalo. Maji yake yamekwisha na hana kitu ambacho kwacho anaweza kutuliza kiu yake kali. Ulimi wake unavimba; anapepesuka kama mtu mlevi. Fikra za nyumbani na za rafikize hupita akilini mwake anapoamini kuwa yu tayari kuangamia. Ghafla anaona kwa mbali, akiinuka kutoka kwenye maisha ya kuchosha mchangani, mtende wa kijani na uliostawi. Tumaini linaamsha mapigo yake, anasonga mbele, akijua kwamba kile ambacho huupatia mtende nguvu na ustawi mzuri kitaburudisha damu yake iliyosisimka na kumpatia uzima mpya.

Kama mtende ulivyo jangwani—kiongozi na faraja kwa msafiri azimiaye ndivyo apaswayo Mkristo kuwa kwa ulimwengu. Anapaswa kuziongoza roho zilizochoka, zilizojawa na misukosuko na zilizo tayari kuangamia katika jangwa la dhambi, kwenye maji ya uzima. Anapaswa kuwaelekeza wanadamu wenzake kwa Yeye ambaye hutoa mwaliko huu kwa wote, “Mtu akiona kiu, na aje kwangu anywe.”

Anga linaweza kuwa kama shaba, mchanga uunguzao unaweza kukwepa mizizi ya mitende na kulundikana kwenye shina lake; lakini bado mti unaishi ukiwa mbichi na wenye nguvu. Ondoa mchanga kisha utagundua siri ya uzima wake; mizizi yake huzama chini kabisa kwenye maji yaliyofichika aridhini.

Ndivyo ipasavyo kuwa kwa Mkristo. Maisha yake pamoja na Yesu yamefichwa ndani ya Mungu. Yesu kwake ni chemchemi ya maji, ibubujishayo uzima wa milele. Imani yake, kama mizizi midogodogo ya mtende, hupenya chini Zaidi ya vitu vinavyoonekana, ikiteka uzima kutoka kwenye chemchemi ya uzima. Na katikati ya uharibifu wote wa ulimwengu anabaki kuwa mkweli na mwaminifu kwa Mungu. Mvuto maridhawa wa haki ya Yesu unamzunguka. Mvuto Wake huinua na kubariki.

Mwanafunzi mnyenyekevu na mnyonge zaidi wa Yesu wanaweza kuwa baraka kwa wengine. Wanaweza wasitambue kwamba wanafanya jambo lolote jema, lakini kwa ushawishi wao pasipo kujua wanaweza kuanzisha mawimbi ya Baraka ambazo zitasambaa na kufika mbali na matokeo yenye baraka wanaweza wasiyajue kamwe mpaka katika siku ile ya thawabu ya mwisho.

Hawatakiwi kujichosha kwa kuwazia yatakavyokuwa mafanikio. Wanachopaswa kufanya tu ni kusonga mbele kimya kimya, wakifanya kwa uaminifu kazi waliyopewa na Mungu na maisha yao hayatakuwa bure. Nafsi zao wenyewe zitakuwa zikikua zaidi na zaidi katika kufanana na Kristo; wao ni watenda kazi pamoja na Mungu katika maisha haya na hivyo wanafanywa kufaa kwa ajili ya kazi ya juu na furaha isiyo na kikwazo ya maisha yajao (*The Signs of the Times*, Agosti 6, 1902).